



Suega Aoao Tausaga 13 a Samoa

GAGANA SAMOA

2020

PEPA FESILI ma TALI

Taimi Faatulagaina: 3 itula & 10 minute

FAATONUGA

1. E 10 minute e faitau ai ae lei amata ona tusi au tali.
2. Tusi manino lau **Numera Aoga** i le pito i luga o le itu taumatau o le itulau lenei.
3. Tusi tali i avanoa ua saunia i totonu o lenei Pepa Fesili ma Tali.
4. Afai e manaomia nisi pepa mo au tali, fesili i le Faisuega mo ni isi pepa fa'aopoopo. Fa'apipi'i pepa fa'aopoopo i itulau talafeagai o le pepa suega. Tusi le Numera 'Aoga i luga o laupepa fa'aopoopo uma.

ALAFUA MO MATAUPU AOAONA	Itulau	Taimi (min)	Togi
ĀLĀFUA 1: VĀEGA 'ESE'ESE O LE GAGANA	2	15	8
ĀLĀFUA 2: A'OINA O GAGANA	3	40	22
ĀLĀFUA 3: FA'AMAUMAUGA MA FETUFAA'IGA	8	50	28
ĀLĀFUA 4: FESO'OTA'IGA MA ĀLA FA'ASALALAU	16	43	24
ĀLĀFUA 5: AGANU'U MA ĀGAIFANUA	21	4	4
ĀLĀFUA 6: FA'AFIIFIAGA MA TA'ALOGA	22	25	14
AOFA'IGA		180	100

SIAKI lau pepa po'o atoa uma itulau mai le 2-25.

TAUAAO LAU PEPA FESILI MA TALI I LE FAISUEGA PE A MAEA LE SUEGA

- O le vāega lenei, olo'o iloilo ai vāega 'ese'ese o le gagana.
- Tusi uma au tali i avanoa ua saunia.

1. Tusi sau fuaiupu 'anoa se tasi e fa'aaogā ai uiga lasi o le upu **sua**.

Tomai 'ausia 2

2. Fa'ailoa mai le 'ese'esega o le **tuale** ma le **pelulale** i le Gagana Sāmoa.

Tomai 'ausia 2

3. Fa'amālamalama manino mai le uiga o le **nauna** ma fa'amatala mai le 'ese'esega o le **nauna ta'atele** ma le **nauna fa'apitoa**. Aumai ni fa'ata'ita'iga.

Tomai 'ausia 4

- **Faitau manino le solo ona tali lea o fesili o mulimuli mai.**

E ola fausaga

- 1 E! pe moni 'ea lau tala,
 'Ua tapisa ai nei tagata,
 To'atele o ē taufa'alata,
 'Ua lātou vagaia le '**ata'ata**,
- 5 'A 'o ta'oto isi ona vai lapa,
 Ma tilotilo atu i le **papata**,
 Le **maoa'e** ma nai ona mata,
 Fa'atau pupula atu i le **gata**,
Mano'o ma 'ama'ama o lalopapa,
- 10 E sema e le 'ava'ava,
 E o'o i avi'i o le matāfaga,
 Tulitausi'a 'e tulī gālala,
Su'e fuefue i le tafa o ata,
 Se'e ane i le moana,
- 15 Māfaufau i le fugafuga ma lona va'ava'a,
Ma le palolo e lua i le tausaga,
 'A 'o nei fo'i maisu ta'ugauli o le vasa,
 Ma 'alu'alu e ō fa'atatafa,
Leitioa fole ma tio a fai ma fili o tagata,
- 20 Fai mai o le **laumei tua lalafa**,
 'Ua logo atu le tala,
 Fai mai o ia e leaga,
 Fai togafiti, fia pule 'ae 'auleaga,
 'A 'o se'e ane pea lona va'a,
- 25 Ma fa'apea atu i lana 'aumalaga,
 A mamā tou ala,
 Togi ane ni a tou ma'a,
 E sau pea mālama,
 Tupu 'oe o le vasa,
- 30 Ni peau e laga va'a,
 Lou faiva e laulau sasa'a,
 Pei o tino o tuitui ma vaga,
 Ma lona mōmoga e sasala,
 'A 'o ipo na tou taumamafa,
- 35 Laulelei ai tou manava,
 'Ona tou leo tetele lea ma 'alaga,
 E mate galuega 'ae ola Fausaga.

Si'itia mai le Tusi : Olo'o iai Satani i lou fanua fa'amolemole tuli 'ese
Tusia e : Ta'iao Matiu Matāvai Tautunu Aumua

4. **Laina 4.** O le a le 'ata'ata?

Tomai 'ausia 1

5. **Laina 6.** Ma tilotilo atu i le papata.

O le ā le vāega o le gagana e iai le upu o lo'o vase?

Tomai 'ausia 1

6. **Laina 7.** Le maoa'e ma nai ona mata.

Laina 8. Fa'ataupupula atu i le gata.

O le ā le 'ese'esega o le maoa'e ma le gata e pei ona tā'ua i le solo?

Tomai 'ausia 2

7. **Laina 9.** Mano'o ma ama'ama o lalopapa.

O lē fea o upu o lo'o vase lalo o le isi ona igoa o le ūfu?

Tomai 'ausia 1

8. **Laina 13.** Su'efuefue i le tafa o ata.

Fa'amālamalama manino lelei mai le uiga o lea fuaitau.

Tomai 'ausia 3

9. Laina 16. Ma le palolo e fa'alua i le tausaga.

Fa'ailoa mai masina e lua e ta ai le palolo.

Tomai 'ausia 2

10. Laina 19. Leitia fole ma tio a fai ma fili o tagata.

Fa'amālamalama lelei mai po'o a ia mea a o ai tagata o lo'o fa'atatau ai lea fuaiupu.

Tomai 'ausia 3

11. Fa'amatala ma fa'amālamalama lelei mai le uiga ma le aotelega atoa o lenei solo.

Tomai 'ausia 4

12. Laina 20. Fai mai o le laumei tualalafa

O le ā le fa'aaloalo o le laumei ma o le ā foi le vāega tāua o le laumei pe a fa'asoa?

Tomai 'ausia 3

13. Laina mulimuli. E mate galuega ae ola fausaga.

O le ā sau fa'auigaga faigofie o lea fuaitau?

Tomai 'ausia 2

- **Faitau le lauga ia mālamalama ona tali lea o fesili ua saunia**

Samoa e, afai e i ai se **'aleu** ma se masei, pei o le muagagana, **e leai se faiva e 'asa ma le maumau**. Auā o ma'ua lava o ni tagata e vaivai ma lē atoatoa. O le ā fo'i se mea ua lape i la tou silasila, e faamālūlu atu, ona ua pau o le mea e gata mai ai lo ma malosi ma lo ma mafai. A o manava o Maile ia fuli mai le mauga ina ia faamaonia ai e fa'asilisili Ierusalemā i ō ma mafaufau.

Afai e i ai se manuia ma se lelei i le ma taulaga, e fiafia e 'alaga i le 'alaga a Kerisiano "Ia viia le Atua!" Ia fa'amanuia le Atua i ē na aumaia le avanoa iā i ma'ua, o le Malo ma le **Palemene**. Ia fa'amanuia le Atua i tagtata uma o Samoa, aemaise i latou sa fa'asoa mai le **tofa ma le fa'autaga**, e le gata i mafaufauga lelei a o le latou alofa tula'i.

O le matua o le tautalaga, **Afai ou te lē manatua oe Ierusalemā, ia pipi'i a'e lo'u laulaufaiva i lo'u gutu**. Samoa e, o lau tu ma lau aga, o lau mau tu'ufa'asolo, o lou tofi ma lou fa'asinomaga, o lo tatou Ierusalemā lea. O lo'o i a'ao o le Atua le tatou fanoga ma le tatou tatalo fa'anaunau, ia fa'aauau e tatou fanau ma ā latou fanau, ia le 'anava ma le 'iliāi'a le tofi ma le fa'asinomaga.

Se vāega o le Lauga Fa'amavae a le Ao o le Malo Tui Atua Tupua Tamasese Efi

19 Iulai 2017

14. **Laina muamua:** Samoa e afai ua iai se **'aleu**...

Ta'u mai le fa'afeagai o le upu o vase lalo

Tomai 'ausia 1

15. Laina muamua. E leai se faiva e asa ma se maumau.

Tusi mai le uiga moni o lea fa'aupuga.

Tomai 'ausia 2

16. Tusi sau palakalafa e fa'amatala ma fa'amālamalama mai ai le aotelega o le palakalafa muamua o le lauga.

Tomai 'ausia 3

17. E fia sui faipule o le Palemene o Samoa?

Tomai 'ausia 1

18. **Palakalafa 3: Afai ou te le manatua oe, ia pipi'i a'e lou laulaufaiva i lo'u gutu.**
Fa'ailoa mai le tusi o le Tusi Paia e maua ai lea fuaitau ma tusi mai sona
fa'augaga faigofie.

Tomai 'ausia 3

19. O oe o le ta'ita'i o le vasega. Ua tofia oe e te faia le tautalaga e fa'amāfanafana ai i matua o le tamaitiiti o la outou vasega na maliu i le fa'amai o le Misela. Tusi lelei mai lau tautalaga sa fai.

Tomai 'ausia 4

20. Fa'amālamalama mai le 'ese'esega o **aganu'u ma agaifanua** a Sāmoa.

Tomai 'ausia 2

21. Fa'ailoa mai le faiva i le vao e mafua ai le alagā'upu ma le uiga o le upu olo'o vase;

Ua ifo le tuamafafilimalae i le fogatia

Tomai 'ausia 2

TUSIGĀTALA:

FESILI 22 – 25.

- * Filifili se Ulutala se **tasi** e tusi ai lau tala.
- * Ia 150 – 200 upu le umi o le tala.
- * Ia maua i lau tala tomai ma agava’a nei:
 - Ola le folasaga ma feso’ota’i i le autū. **(Tomai Ausia 1)**
 - ‘Oa ma sa’o le gagana. **(Tomai Ausia 2)**
 - ‘Anoa manatu ma fa’asolo lelei i palakalafa. **(Tomai Ausia 3)**
 - Lelei le fa’aiuga ma le aotelega. **(Tomai Ausia 4)**

Ulutala:

1. E tetele Pesega ae matua i le oō
2. O le tupua lilo ua mateia
3. E le sufia e le mālmalama le pogisa
4. Ua atoa lio o le masina
5. Ua ou inu i le suamalie o le fa’amaoni

- Tali uma fesili o le vāega lenei i avanoa ua saunia.

26. Ta'u mai le mea e tupu pe a tagi le **ti'otala**.

Tomai
'ausia 1

--

27. Fa'ailoa mai se **Pule** se tasi o Savai'i.

Tomai
'ausia 1

--

28. Fa'amatala mai le mafua'aga o le **Malae o le Niniva** ma fa'ailoa mai le nu'u po'o le itūmālō e iai.

Tomai
'ausia 3

--

29. Fa'ailoa mai le matagi o Samoa e **agi mai sasa'e** ma le matagi e **agi mai sisifo**.

Tomai
'ausia 2

--

31. Fa'amatala mai le uiga o le upu **feagaiga** e ave i le tama'ita'i.

Tomai 'ausia 2

32. Fa'auma e oe le fuaiupu i upu talafeagai.

Aua le poia _____ ae sei saili le _____ a le Aosavai'i

Tomai 'ausia 2

Gagana Fa'amauina

Fesili 33 – 36

- * Filifili se **Tala Pu'upu'u (Tala Pu'upu'u)** po'o se **Tala Moni** po'o se **Tala Fatu** na e su'esu'eina e tali mai ai le vāega lenei.
- * Fa'aaogā na'o tala olo'o fa'amauina i le Fa'asinoala.
- * A tusi lau tali, ia aofia ma manino vāega nei:
 - Fa'amatalaga o manatu 'autū **(Tomai Ausia 3)**
 - Mālamalamaaga i le tala (fa'ata'ita'iga ma pine mai le tala) **(Tomai Ausia 4)**

FESILI:

Fa'amatala mai se **tagata 'autū** na matua iloga ona e fiafia iai. O ā ni **fa'afitauli** na feagai ma lea tagata ma o le a se **aoaoga tāua** na e maua mai lea tagata?

TALI:

Igoa o le Tala: _____ **(Tomai Ausia 1)**

Igoa o le Tusitala po'o lē na Fa'aliliuina: _____ **(Tomai Ausia 1)**

Igoa o le Tusi _____ **(Tomai Ausia 1)**

Mo le Togipepa

33	34	35	36
1	1	3	4

Ava o le Feiloaiga

37. Fa'amatala ma fa'amālamalama lelei mai le fa'asologa o le **Ava o le Feiloaiga** i le va o le **nu'u malaga** ma le **nu'u talimālō**. Amata mai i le amataga seia o'o i le fa'aiuga.

Tomai 'ausia 4

- O fesili o le vāega lenei o lo'o 'oto'oto mai i vāega 'ese'ese o ta'aloga ma fa'afiafiaga a Samoa.

38. Fa'ailoa mai le ta'aloga ua fa'aigoaina; **O le ta'aloga i vai.**

Tomai
'ausia 1

39. O le a le fa'afiafiaga e iai le vaogagana lea; **Ua sugalu aualuma.**

Tomai
'ausia 1

40. Fa'amatala ma fa'amālamalama lelei mai le fa'afiafiaga a Samoa ua tā'ua; **o le Pese Fa'aleaganu'u.** O le a le mafua'aga o lea fa'afiafiaga? E fa'apefea ona fa'atino?

Tomai
'ausia 4

41. Fa'amatala mai le fa'atinoga o le aganu'u ua fa'aigoaina; **O le osi toilalo i ta'alogā a Sāmoa.**

Tomai 'ausia 2

42. Fa'amatala mai le 'ese'esega o le **se'e a le taupou i le tauluga** ma le **se'e i le ta'alogā o le kilikiti.**

Tomai 'ausia 2

Nūmera Ā'oga									

GAGANA SĀMOA

2020

(Mō le Togipepa)

ĀLĀFUA	TOGI	TOGI 'AUSIA	TOGI AOFA'I
ĀLĀFUA 1: VĀEGA 'ESE'ESE O LE GAGANA	8		
ĀLĀFUA 2: A'OINA O LE GAGANA	22		
ĀLĀFUA 3: FA'AMAUMAUGA MA FETUFA'AIGA	28		
ĀLĀFUA 4: FESO'OTA'IGA I ALAFA'ASALALAU	24		
ĀLĀFUA 5: AGANU'U MA AGAIFANUA	4		
ĀLĀFUA 6: FA'AFIIFIAGA MA TA'ALOGA	14		
AOFA'IGA	100		